



QVÆSTIO MEDICA

QUOD LIBETARIIS DISPUTATIONIBUS

manè discutienda in Scholis Medicorum

die Jovis 16. Januarii.

M. ANTONIO LE MOINE, Doctore Medico, Præside.

An visionis primum instrumentum retina?

I.

SENSUUM instrumenta, velut excubiæ in summo aut extimo corpore posita, à rebus externis impelluntur: cuiuslibet peculiaris & mira compages, quæ omnibus numeris absoluta, machina quibusdam habetur; à similibus spiritibus quælibet regitur, à diversâ tamen compage diversa affectio: licet quinque sint tantum sensus, plura tamen sentiri posse, quam quæ per eos sentiuntur, conjectura est legitima. Animal, quantumvis imperfectum, saltem aliquo beatur sensu. In perfectis non est æquabilis omnium sensuum necessitas: Oculus & auris carere possunt suo munere absque detrimento; addi potest & olfactus: hi tres minimo spatio conclusi minimam nervorum partem occupant, quæ impunè feriat. Tactus ad totius structuram pertinens, ad tempus nullus esse potest, perniciem tamen affert, quia non vacat nisi labefactâ nervorum œconomiâ. Gustus hebes qui alimenta non discernit, & in stomacho inertem ζύμωσιν arguit, quasi iisdem nervis hic & lingua per medium œtophagum instrueretur, brevi ruinam minatur.

II.

QUÆ ambiunt corpus animatum, vel conjuncta afficiunt, vel ab iis effluit aut resilit à quo immutetur: hæc mutatio

2

certis quibusdam limitibus comprehensa imago dicitur, quam excipiunt spiritus, atque integram insculpunt in cerebro, plurimum motuum occasionem. Hanc imaginem semel in cerebro impressam absque re facile recudit spiritus imaginationis author. Quam cerebri parte imprimatur, quaesitum est ac quaeretur. Vero proximum est consistere propter nervorum principium, unde facilis spirituum descensus. Species intentionales, quas adolescens Philosophia finxerat, senilis explofit. Rei praesentis imaginem varii sequuntur motus amici vel odiosi. Hos etiam re absente spiritus solius aut cogitatione adjuti efficientia potest renovare. Sed in quolibet organo una est praecipua pars cui inscribitur imago, membrana fibris nerveis confita. Haec in oculo maxime insignis testatur unum oculum plus aliis sensibus laborare.

I I I.

OCULUS globus multis ex dissimilibus partibus compo-
ratus, praeter suos humores excipiendis & transmittendis radiis destinatos, membranas & nervum, cum rerum videndarum praesentia potiri debeat, musculos varios etiam obtinuit, rectos videlicet & obliquos, quorum ope quoquoersum facile movetur; in eum tamen res non agit, nisi per aliud, & nisi juvetur ab alio. Illud medium est, quod perspicuum esse debet. Hoc vero lux, a Sole primum, & ab aliis corporibus lucidis, ut vermiculo, pisce, ligno putrescente diffluit: dum autem in orbem diffunditur, lumen vulgo vocatur, quod per lineas rectas ductum, imbecillius evadit, quo magis a fonte recedit. Haec lineae rectae radios constituunt, quorum substantia liquidissima tam necessario per diaphanum fertur, ut in opacum illapsa reflectatur, resiliensque res & rei colores pingat. Hanc porro substantiam a rebus varie disponi declarat arcus in nubibus effectus ex aqua, & prisma; per utrumque colorantur radii.

I V.

ILLUSTRATA res cum iactura radios remittit? Hi per
uveae foramen seu pupillam, quae veluti patens ostium est, in humores excipiuntur & coguntur, non indiscriminim, sed certo loco. Ut visio fiat accurata, ab unoquoque rei puncto emissi radii, in eodem oculi puncto debent coire, & postea distracti & decussati dum in oculi fundum projiciuntur, omnes

ab uno & eodem prodeuntes puncto, uniti debent unum & idem oculi punctum afficere: à diversis autem, diversa: Sicque alterum in oculo conum eversum, externo qui rectus est optimè respondentem efformare. Id ut fiat, cum subeunt oculum, non utique rectam viam insistant, sed ad perpendicularum franguntur vel recedunt ab eodem, dum à rariori in densius, aut à densiori in rariis penetrant: talem vim non patiuntur qui in oculum rectà feruntur. Ad hanc radiis affectionem pariendam plurimum facit oculi fabrica, & crystallini humoris convexitas major & minor, diversa à fundo distantia, & diversa quoque figura, quòd processuum ciliarium ope fit. Hi pro diverso radiorum ab objectis emissorum illapsu, crystallinum, si docilis non durior sit, debito modo componunt, accuratumque retinae plerumque conciliant, ut distincta fiat projectio. Ne etiam nimia lux oculum offendant, pupilla quoque sui constrictione vehementioris luminis parum, aut dilatatione debilioris plurimum admittit. Senio confectus oculus propter crystallini membranarumque duritiem, figuræ mutandæ ineptus, eam tantum habet quæ remota advertit, quod vitium, convexi vitri ope emendatur. Etsi duplex oculus, duplexque imago, duplex tamen non cernitur objectum: quòd imagines hæ nullam prorsus inter se diversitatem habentes, velut unica, cerebro reddantur; hinc si vel leviter distorqueatur oculorum alter, cum diversâ ratione incidant radii, diversa fit refraction, objectumque in diverso situ, sicque duplex, etsi unicum sit, apparet.

V.

RETINA, nerveum textile, ab ipsâ cerebri substantiâ ortum habens, radios ad perpendicularum ob figuram concavam excipiens, ab eodem objecti puncto prodeuntium unionem terminans, imaginem suscipit. In crystallinum & vitreum humorem recipiuntur radii: sed & per eosdem, vividiores facti transmittuntur: & quamvis ibi retinerentur, fieri tamen non posset visio, quin maximè confusa, & multiplex, vel quantitatis expers appareret objectum: atque etiam si nullatenus confusi, sed omnino distincti essent radii, nullus moveretur nervus. Proprium retinae officium ars demonstrat. Bovis recens mactati oculus postremâ sui parte orbatus, adeo ut vitreus humor membranâ nitidissimâ contineatur, in hac eadem membranâ imagines fingit, si mo-

4

do tenebricosissimi loci foramine lumen suscipiat. Majori figurâ arte formatur oculus: vitrum perspicuum, corneam, vitrum lentis in morem fabricatum, crystallinum humorem constituit; retinam repræsentat papyrus albissima, hæc ut machina figuræ oculi quodammodo imiteretur, mobilis ad immobile crystallinoides vitrum accedit aut recedit. Res visæ huic papyro suam imaginem inscribunt. Imago ut sit distincta, papyrus certo debet esse loco, quem ultrâ aut citrà informis omnino species. Atque id non modo rerum, sed & visionis ipsius typum exhibet.

Ergo visionis primum instrumentum retina.

DOMINI DOCTORES DISPUTATURI.

*M. Claudius Puylen,
Scholarum Professor.*

M. Dominicus de Farcy.

M. Claudius Guerin.

M. Claudius Berger.

M. Henricus Mahien.

M. Claudius Germain.

M. Claudius Biendisant.

M. Claudius Guerin.

M. Germanus Frenaux.

Proponebat Parisiis GUYDO-ERASMUS EMMEREZ,
Parisius Baccalaureus Medicus, A. R. S. H. 1681.

P A R I S I I S,

Apud Franciscum Muguet, Regis & Facultatis Medicinæ
Typographum.